

名醫類案卷第五

新都篁南江瓘集 後學

仁和余集蓉裳
錢塘魏之珩玉橫
仁和沈煥敦曾

鮑廷博以文 重校

癥瘕

齊中尉潘滿如病少腹痛臣意診其脉曰遺積瘕也臣意即

謂齊太僕臣饒內史臣繇曰中尉不復自止於內則三十

日死後二十餘日溲血死病得之酒且內所以知潘滿如

病者臣意切其脉深小弱其卒然合合也是脾氣也右脉

口氣至緊小見瘕氣也以次相乘故三十日死三陰俱搏

者如法不俱搏者決在急期一搏一代者近也故其三陰

搏洩血如前止

史記

臨菑女子薄吾病甚衆醫皆以爲寒熱篤當死不治臣意診其脉曰螻瘧。螻瘧爲病腹大上膚黃粗循之戚戚然臣意飲以芫花一撮卽出螻可數升病已三十日如故病螻得之於寒溼寒溼氣宛篤不發化爲蟲臣意所以知薄吾病者切其脉循其尺其尺索刺粗而毛美奉髮是蟲氣也其色澤者中藏無邪氣及重病

史記

博按此案重見諸蟲門

隋有患者嘗飢而吞食則下至胸便卽吐出醫作噎疾膈氣翻胃三候治之無驗有老醫任度視之曰非三疾蓋因食

蛇肉不消而致，但揣心腹上有蛇形也。病者曰：素有大風，常求蛇肉食，風稍愈，復患此疾矣。遂以芒硝、大黃合而治之，微泄利則愈。乃知蛇瘕也。

名醫錄

乾德中江浙間有慎道恭，肌瘦如勞，唯好食米，闕之則口中清水出，情似憂思。食米頓便如常。衆醫莫辨，後遇蜀僧道廣，以雞屎及白米各半合，共炒爲末，以水一盞調頓服。良久病者吐出如米形，遂瘥。病原謂米瘕是也。

徐文伯善醫術。宋明帝宮人患腰痛，牽心發，則氣絕。衆醫以爲肉瘕。文伯視之曰：此髮瘕也。以油灌之，卽吐物如髮，稍引之，長三尺，頭已成蛇，能動，懸柱上，水瀝盡，唯餘一髮而

已遂愈

唐書曰甄權弟立言善醫時有尼明律年六十餘患心腹膨脹身體羸瘦已經二年立言診其脉曰腹內有蟲當是誤食髮爲之耳因令服雄黃須臾吐一蛇如小手指唯無眼燒之猶有髮氣其疾乃愈

太平御覽

異苑曰章安有人元嘉中噉鴨肉乃成瘕病胸滿面赤不得飲食醫令服秫米須臾煩悶吐一鴨雛身喙翅皆已成就唯左脚故綴昔所食肉遂瘥

太平御覽

志怪曰有人得瘕病腹晝夜切痛臨終救其子曰吾氣絕後可剖視之其子不忍違言剖之得一銅酒鎗容數合許華

佗聞其病而解之，便出巾櫛中藥以投，卽消成酒焉。博按

事涉怪誕不足徵信世安有剖父腹以驗病之理此案可刪

景陳弟長子拱年七歲時，脇間忽生腫毒，隱隱見皮裏一物，

頗肖鼈形，微覺動轉，其掣痛不堪。德興古城村外有老醫

見之，使買鮮蝦爲羹以食，咸疑以爲瘡毒所忌之味。醫竟

令食之，下腹未久，痛卽止，喜曰：此真鼈癥也。吾求其所好，

以嘗試之，爾乃製一藥如療脾胃者，而碾附子末二錢投

之，數服而消。明年病復作，但如前補治，遂絕根。類編

昔有人共奴俱患鼈癥，奴前死，遂破其腹，得白鼈，仍故活，有

人乘白馬來看鼈，白馬遂尿，隨落鼈上，卽縮頭，尋以馬尿

灌之卽化爲水其主曰吾將瘥矣卽服之遂愈續搜神記

昔人患癥瘕死遺言令開腹取之得病塊乾硬如石文理有

五色人謂異物竊取削成刀柄後因以刀刈三稜柄消成

水乃知此藥可療癥瘕也本草

一人患蛇瘕常飢食之卽吐乃蛇精及液沾菜上人悞食之

腹內成蛇或食蛇亦有此症用赤頭蜈蚣一條炙爲末分

二服酒下

一人患鼈瘕痛有來止或食鼈卽痛用雞屎一升炒黃投酒

中浸一宿焙爲末原浸酒調下

一人好飲油每飲四五升方快意乃悞吞髮入胃血裏化爲

蟲也。用雄黃五錢，水調服。

石藏用蜀人良醫也。名盛著。一士人嘗因承簷溜盥手，覺爲物觸入指爪中。初若絲髮然。旣數日，稍長如線，伸縮不能如常。始悟其爲龍伏藏也。乃扣治療之方於石。石曰：此方書所不載也。當以意去之。歸可末蜣螂塗指，庶不深入胸膜。冀他日免震厄之患。士人如其言。後因迅雷，見火光遍身。士人懼，急以鍼穴指，果見一物自鍼穴躍出，不能災。桓宣武有一督將，因時行病後虛熱，便能飲複茗，必一斛二斗，乃飽。裁減升合，便以爲大不足。後有客造之，更進五升，乃大吐一物出，如升大有口形，質縮皺，狀似牛肚。客乃令

置之盆中，以斛二斗，復茗澆之。此物噏之都盡而止。覺小
脹，又增五升，便悉渾然。從口中湧出，既吐此物，遂瘥。或問
之，此何病？荅曰：此病名斛茗瘥。續搜神記

齊諧記云：江夏安陸縣隆安中，有人姓郭名坦，得天行病後，
遂大善食，一日消斗米。家貧不能給，行乞於市。一日大飢，
不可忍，人家後門有三畦薤，因竊啗之，盡兩畦，便大悶極，
臥地，須臾大吐，吐一物如龍，因出地漸小。主人持飯出食
之，不復食。因撮飯著所吐物之上，即消而成水。此病尋瘥。

東坡物類相感志

永徽中崔爽者，每食生魚三斗乃足。一日飢，作鱠未成，忍飢

不禁遂吐一物如蝦蟆自此不復能食鱸矣宣室志

有黃門奉使交廣回周顧謂曰此人腹中有蛟龍上驚問黃門曰卿有疾否曰臣馳馬大庾嶺時大熱困且渴遂飲水覺腹中堅痞如石周以硝石及雄黃煮服之立吐一物長數寸大如指鱗甲具投之水中俄頃長數尺復以苦酒沃之如故以器覆之明日已生一龍矣上甚驚訝明皇雜錄

褚澄治李道念有冷疾元本五年衆醫不瘥澄爲診脉謂曰

汝病非冷非熱當是食白瀹雞子過多所致令取蒜一升煮服之始一服吐一物如升涎裹之動開看是雞雛羽翅爪距具足能行走澄曰此未盡更服所餘藥又吐得如向

者有十三頭而病都瘥

南史

證治要訣云一人病癥瘕腹脹純用三稜莪朮以酒煨服下一物如黑魚狀而愈或加入香附子用水煎多服取效
一人自幼好酒片時無酒叫呼不絕全不進食日漸羸瘦或執其手縛柱上將酒與看而不與飲卽吐一物如猪肝入酒內其人自此遂惡酒

潘璟字溫叟名醫也虞部員外郎張咸之妻孕五歲南陵尉富昌齡妻孕二歲團練使劉彛孫妾孕十有四月皆未育溫叟視之曰疾也凡醫妄以爲有孕爾於是作劑飲之虞部妻墮肉塊百餘有睂目狀昌齡妻夢二童子色漆黑倉

卒怖悸疾去、彝孫妾墮大蛇、猶蜿蜒不死、三婦皆無恙、夷堅

志○琇按此案重見
第十一卷娠症門

鎮陽有士人嗜酒、日嘗數斗、至午夜飲興一發、則不可遏、一
夕大醉、嘔出一物、如舌、視無痕竅、至欲飲時、眼徧其上、轟
然而起、家人沃之以酒、立盡、至常日所飲之數而止、遂投
之猛火、急爆裂爲十數片、士人由是惡酒、

汾州王氏得病、右脇有聲如蝦蟆、常欲手按之、不則有聲、聲
相接、羣醫莫能辨、詣畱陽山人趙巒診之、趙曰、此因驚氣
入於臟腑、不治而成疾、故常作聲、王氏曰、因邊水行次、有
大蝦蟆、躍高數尺、驀作一聲、忽驚叫、便覺右脇牽痛、自後

作聲尚似蝦蟆也久未瘥巒乃診王氏脉右關脉伏結積病也故正作積病治用六神丹泄下青涎類蝦蟆之衣遂

瘥 名醫錄

昔有患者飲食如故發則如癲面色青黃小腹脹滿狀如妊孕醫診其脉與証皆異而難明主療忽有一山叟曰聞開皇六年灞橋有患此病蓋因三月八日邊水食芹菜得之有識者曰此蛟龍病也為龍游於芹菜之上不幸食之而病也遂以寒食餒每劑五合服之數劑吐出一物形雖小而狀似蛟龍且有兩頭獲愈

句容縣佐史能啖鱸至數十觔恒食不飽縣令聞其善啖乃

出百觔，史快食至盡，因覺氣悶，久之吐一物，狀如麻鞋底，令命洗出，安鱸所，鱸悉成水，醫莫能名之，令小吏持往揚州賣之，冀有識者，誠之，若有買者，但高舉其價，看至幾錢，有胡求買，增價至三百貫文，胡輒還之，初無酬酢，人謂胡曰：是句容縣令家物，問此是何物，胡云：是銷魚之精，亦能銷腹中塊，病人患者，以一片如指端，繩繫之，置病所，其塊卽銷，我本國太子少患此病，王求愈病者，賞之千金，君若見賣，當獲大利，令竟賣半與之。

廣異記

和州劉錄事者，大歷中罷官，居和州旁縣，食兼數人，尤能食鱸，嘗言鱸味未嘗果腹，邑客乃網魚百餘觔，會於野庭觀

其下筋劉初食鱠數楮忽似小哽因設出一骨珠子大如
豆乃寘於茶甌中以楮覆之食未半怪覆甌楮傾側舉視
之向骨珠子已長數寸如人狀座客共觀之隨視而長頃
刻長及人遂捽劉因相毆流血良久各散走一循廳之西
一轉廳之左俱及後門相觸翁成一入乃劉也神已癡矣
半日方能語訪其所以皆不省之劉自是惡鱠

酉陽雜俎

戴人治王宰妻病胸膈不利用痰藥一湧而出雪白蟲一條
長五六寸有口鼻牙齒走於涎中病者忿而斷之中有白
髮一莖按永徽中破一物其狀如魚卽所謂生瘕也

嘉靖中長洲鄒表妻患小腹下左生一塊形如梅李久之吐

出始則腐潰若米糲之狀中則若蜆肉之狀以指撚開則有長髮數條在其內名醫竟不能治遂至不起夫蛇髮等瘕往往載於方書或偶因食物相感假血而成理或有之不可指爲妄誕也

山東民間婦人一臂有物隱然膚中屈佶如蛟龍狀婦喜以臂浸盆中一日雷電交作自牖出臂果一龍擘雲而去

錄

積塊

羅謙甫治真定王用之年二十九歲病積臍左連脇如覆杯

腹脹如鼓。多青絡脉。喘不能臥。時值暑雨。加之自利完穀。日晡潮熱。夜有盜汗。以危急求治。羅視之。脉得浮數。按之有無疑力。謂病家曰。凡治積。非有毒之劑。攻之則不可。今脉虛弱如此。豈敢以常法治之。遂投分滲益胃之劑。數服而清便自調。繼以升降陰陽。進食和氣。而腹大減。胃氣稍平。間以削之。月餘良愈。先師嘗曰。潔古有云。養正積自除。譬之滿座皆君子。縱有小人。自無所容。今令真氣實。胃氣強。積自除矣。潔古之言。豈欺我哉。內經云。大積大聚。衰其大半而止。滿實中有積氣。大毒之劑。尚不可過。况虛中有積者乎。此亦治積之一端也。邪正虛實。宜精審焉。

丹溪治一婦。性急多勞。斷經一月。小腹有塊。偏左如掌大。塊起卽痛。盛腹漸腫脹。夜發熱。食減。其脉冬間得虛微短澹。左尤甚。初與白朮一觔。和白陳皮半觔。作二十貼煎服。以三聖膏貼塊上。經宿塊軟。再宿則塊近下一寸。旬日食進。痛熱減半。又與前藥一料。加木通三兩。每貼加桃仁九箇。而愈。

一人年六十。素好酒。因暑忽足冷過膝。上腕有塊如拳。引脇痛。不可眠。食減不渴。已服生料五積散三貼。脉沉澹數小。而右甚。便赤。用大承氣湯。大黃減半而熟炒。加黃連芍藥。川芎。乾葛。甘草。作湯。以括蕁仁。半夏。黃連。貝母爲丸。吞之。